

Gui'ch yaløj bacaa San Juan

Jesucrist runee guialnaban tiblayaa

¹ Gui'ch guie naj par gugojnan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacaagdiajgan, ma baguiaan ni beenman, baguiaan laaman zagdxë, ma baqui' tëen laaman con quijb du yaan. Laaman naj bën runee guialnaban,

² ma bi'taman loj guidxliuj, ma baguiaan laaman, dunujn nayajc testiw ragojn tëen lëjt xcwentaman. Laaman naj bën runee guialnaban tiblayaa, najman bën guzunë Dios diizd gocli bi't tëeman loj guidxliuj.

³ Zeel ragojnan lëjt ni ma baguiaan ni ma baguiejn tëen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist.

⁴ Ragojnan lëjt nine ree loj gui'ch guie din chu' luxdoodi zagdxë, zi'c yu' du luxdoon zagdxë.

Rayalyanaab ree loj Dios din güünman dux tol ree perdon

⁵ Ni ne naj ni balüü Jesucrist dunujn, yan ragojnan lëjt guial naj Dios biani, achetczi dol nabannëman.

⁶ Bal yaguie'ch ree nadxu'në' reeman abi' zunaal gajc ree nejz mal rasquiee ree ad zunaalt ree diidxli.

⁷ Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du

lasa' ree. Abi' xrejn xi'nman Jesucrist chiquied gra dux tol ree.

⁸ Bal yaguie'ch ree achet dux tol ree yu', rasquiee dunuj gajc ree, ad cayguie'ch tēēt ree diidxli.

⁹ Per bal yaxhoobdol ree loj Dios, rayagbee ree zagdxē guial gūünman ni naman, gūünman perdon dux tol ree, chiquied tēēman gra ni mal yu' du luxdoo ree.

¹⁰ Per bal yaguie'ch ree ad waguieent ree dol, raguieen reeman zi'c bēnrusquiee, ad raliduladx tēēt ree xtiidxaman.

2

Bén rēn Dios rayal guzoobaman xtiidxaman

¹ Xi'n, rucan nine ree par lējt chitēē gūündi dol. Per bal chu lējt rüjn dol, raya'p ree bēn guiniee por dunuj ree loj Dios, laaman naj Jesucrist bēn ad wayüjntczi dol.

² Por xguialgüjtaman naj dux tol ree perdon, abi' ad dux toltzi ree, nē gra xtol ree bēnguidxliuj.

³ Bal razoob ree xtiidx Dios, zian raya'p ree segur guial ma nagueienbee reeman zagdxē.

⁴ Per bal chu rēb: “Nünbeen Dios”, abi' ad ruzoob-taman xtiidxaman, rusquieeman, din ad walit ni rēbaman.

⁵ Per bēnruzoob xtiidxaman, diidxli rēnman laaman con guidib luxdooan, zian rayagbee ree guial ma nabajnnē' reeman.

⁶ Bēn rēb nabannēman Dios, rayal guibanman zi'c guban Jesucrist.

Bén zinal ree xnejz Dios rēn lasa' reeman

7 Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan.

8 Per canin laa reen zi'c rulüü diidx cüb reen, din por Jesucrist në por lëjt ma rguien guial ma cusa'ndi ni mal abi' zinalidi ni zagdx.

9 Bal chu rëb zinal xnejz Dios abi' ralen lasa'man, sta zinalaman nejz mal.

10 Bén rën lasa' zinalaman xnejz Dios, abi' ma naj nawëëg guial güün dol laaman gan.

11 Per bén ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bénlutia'p.

12 Xi'n, rucan gui'ch guie par lëjt, din ma gojc xtolidi perdon por xguialrniabee Jesucrist.

13 Cucan nine ree par lëjt guial najdi bén ma rignia' mazri chunin naj Jesucrist. Bén ma yu' gocli diizd chi gad guidxliuj gacchaaw, cucan ni ne ree par lëjt bén ma rignia' ta'n chunin naj Jesucrist din ma beendi gan ad züjntidi ni zëed loj xinxab, cuca tëen nine ree par lëjt bén qui guzuløjri ree cayignia' chunin naj Jesucrist din ma nünbeedi dux Dad ree Dios.

14 Bacan nine ree par lëjt guial ma rignia'di mazri chunin naj Jesucrist bén ma yu' gocli diizd chi gad guidxliuj gacchaaw, baca tëen nine ree par lëjt guial ma rignia'di ta'n chunin naj Jesucrist, din za'dxi'chidi zinal tëedi diidxli xnejz Dios con guidib luxdoodi, ma been tëedi gan ad züjntidi ni zëed loj xinxab.

15 Ad sëëbladxidi ni ad najt zagdx ni rüjn ree bejn loj guidxliuj, bal chu rën mazri ni riga' loj

guidxliuj guie, ad rëntaman dux Dad ree Dios,

¹⁶ din achetczi ni mal yu' loj guidxliuj guie zëäd loj Dios, ni rajc gajc loj guidxliuj guien, rüjn reeman zi'c naj xixgab dxuudx reeman, rzëëbladx reeman gap reeman gra ni ruguiaa reeman, rüjn tää reeman benro' por gra ni rajp reeman.

¹⁷ Per guidxliuj guie yu' dxej nitan con guidib ni mal yu' lojn, per bën naban zi'c rën Dios rajpaman guialnaban tiblayaa con laaman.

Yunaal ree ni naj diidxli

¹⁸ Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bën su contr Jesucrist guiëb tääman laaman naj Jesucrist. Yan zien ree bën ralen laaman ma balüüloj, zeel rayagbee ree guial ma zidyob dxej nit guidxliuj.

¹⁹ Bén ralen ree Jesucrist, duloj gajc ree brii reeman nayajc ree bën rliladx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duloj ree guial raliladx ree Jesucrist, per gojc nine din guiguien guial ad grat reeman naj dux bejn ree.

²⁰ Jesucrist banee xSprijt Dios lojdi, abi' por laaman gradi ma ragbee ni naj diidxli.

²¹ Cucan nine par lëjt, ad guial ad ragbeetidi conin naj ni diidxli, cucanan guial ma ragbeedan, abi' lëjt ragbee guial ni'qui tijb ni rusquiee ad zajct gui't loj ni diidxli guin.

²² Yan, ¿chu naj bën rusquiee? Bén rusquiee naj bën rëb guial ad Jesús naj bën guxhaal Dios loj guidxliuj. Bén rëb zian naj zi'cgajc naj bën za' contr Jesucrist guial ad rliladxtaman Dios ni'qui xi'nman Jesucrist.

²³ Din chutëez bën rëb guial ad najt Jesucrist Xi'n Dios, laaman ad nünbeet dux Dad ree Dios, per bën rëb Jesucrist naj Xi'n Dios në dux Dad ree Dios nünbeeman.

²⁴ Zeel gol binal diidx ma biguiejndi diizd guia'xchej chi bililadxidi Jesucrist. Bal chinalidi diidx guin ree, dxel ziz nabannëquidi dux Dad ree Dios con xi'nman Jesucrist.

²⁵ Abi' ni ma rëb Jesucrist guneeman naj guialnaban tiblayaa.

²⁶ Cucan diidx guie ree par lëjt por ree bën rën gusquiee lëjt.

²⁷ Per nabannëdi xSprijt Dios, bën banee Jesucrist, ad riaadxtidi bën gulüü lëjt, din Sprijt guin gajc rulüü lëjt gra, abi' ganax diidxli ad ni rusquieet, zeel gol gubajn zi'c rniabeeman din gusnuu gaquidi tijbzi con Jesucrist.

²⁸ Yan rnin lojdi xi'n, gol binal xnejz Jesucrist, chitëe yadxeb ree chi gulüülojman, ad zaya'nxtu tëet ree lojman chi gui'taman.

²⁹ Lëjt ragbee guial rüjn Dios zi'c rayal, ragbee tëedi guial graczi ree bën rüjn zi'c rayal, laa reeman naj xi'n Dios.

3

Bën naj ree xi'n Dios

¹ Gol been xgab, plact rën dux Dad ree Dios dunuj ree, zeel balëe dulaj ree xi'n Dios, abi' waliczan nayajc ree xi'nman. Per bën ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman.

² Gradi compniar raliduladx ree Jesucrist, rënan lëjt, rnin lojdi: Ma nayajc ree xi'n Dios, majsi ad

rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguaa ree diidxliczi xhienaag najman.

³ Graczi ree bén riladx guial gac zian, rüjn reeman naguiejn guiban reeman naya delant loj Dios zi'c laaman, guial achet xtolaman.

⁴ Per graczi ree bén ad zinalt ni rniabee Dios, cayüjn reeman dol, din dol naj guial ad rüjnt reeman ni rniabeeman.

⁵ Lëjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczí dxej ad yu' tëet dxej nünman dol.

⁶ Zeel bén naj ree tijbzi con laaman rüjn reeman naguiejn ad rüjnt reeman dol, per graczi bén rüjn dol zianczi ad wayignia't reeman chu najman, ad wayünbee tëet reeman laaman.

⁷ Xi'n, ganin lëjt, ad bal tiëbidi chu gusquiee lëjt, din bén cayüjn ni rën Dios, laaman naya delant lojman zi'c naya Jesucrist delant lojman.

⁸ Per bén yu' loj dol xbejn xindxaban, din xindxab rüjn dol diizd yaløj, abi' Jesús Xi'n Dios bi'taman loj guidxliuj par zianczi din güünman gan loj xguialrniabee xindxab.

⁹ Zeel ni'qui tijb ree bén ma zinal xnejz Dios ad rusnuutri rüjn dol, din ma nabannëman Dios, ad rayal tëetri güünman dol din ma najman xi'nman.

¹⁰ Laa rguien gajc chu reenin naj xi'n Dios chutëe reenin naj xi'n xindxab, din chutëez ad rüjnt ni rën Dios ad rën tëet lasa'man, dxel ad najtaman xi'n Dios.

Rayal yayën du lasa' ree

11 Abi' lëjt ma biguejndi xtiidx Dios diizd guia'xchej guial rayal yayën dulasa' ree.

12 Ad rayalt yaguieen ree zi'c been Caín, cwëjbaman gunabee xindxab laaman, zeel bagüjt bijchaman. Caín been zian, din beenman ganax ni mal, guiáad bijchaman been ni zagdxe.

13 Zeel gradi compniar raliduladx ree Jesucrist, ad gagdxadi bal yalen ree bénguidxliuj lëjt guial ma zinalidi xnejz Dios.

14 Dunuj ree rayagbee guial ad nayajct ree zi'c bengüt par laaman, ma raya'p ree guialnaban delant lojman, guial rayën du lasa' ree. Per Bén ad rënt lasa', sta najman zi'c bengüt par Dios.

15 Graczi Bén ralen lasa' najman zi'c Bén rugüjt bejn, abi' lëjt ragbee, tijb Bén rugüjt bejn ad rajp-taman guialnaban tiblyaaa delant loj Dios.

16 Ma rayagbee ree conin naj guial rën lasa', guial güjt Jesucrist por dunuj ree, yan ziangajc dunuj ree rayal yayën dulasa' ree xt yayëjt ree por laa reeman.

17 Per bal chu tijb dunuj ree ad riaadxt xhienin loj guidxliuj guie abi' ruguiaaman tijb Bén cayaadx laan abi' ad rüjntaman laaman yudar, dxel, ¿xhienaag guiëbaman guial rënman Dios?

18 Xi'n, ganin lëjt, ad con diidxtizi yaguie'ch ree guial rayën dulasa' ree, rayal guiguien guial rayën dulasa' ree por ni raguieen ree.

Raya'p ree segur guial za' në Dios dunuj ree

19 Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman.

²⁰ Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra.

²¹ Zeel zi'c rënan læjt rnin lojdi, bal ragbee du luxdoo ree guial cayguieen ree ni zagdxë, dxel raya'p ree segur guial cayguieen ree ni zagdxë delant loj Dios.

²² Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree naguiejn raguieen ree ni ruladxaman.

²³ Ni ne naj ni rniabeeman yaguieen ree guial yaliduladx ree Jesucrist naj xi'nman yayën tõe dulasas' ree zi'c gunabeeman dunuj ree.

²⁴ Bén rüjn ree ni rniabee Dios, laa reeman nabannë Dios abi' Dios nabannë laa reeman, rayagbee tõe ree guial za'man con dunuj ree por xSprij-taman bén baneeman duloj ree.

4

Bén ad rliladxt Jesucrist ad yu't xSprijt Dios luxdooan

¹ Gradi compniar raliduladx ree Jesucrist, rënan læjt, rni tõe lojdi: ad rliladxidi chutõe Bén rëb rnieeman xtiidx Dios. Yaløj xgaj gol gogbee zagdxë bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree Bén rusquiee, rëb reeman rniee reeman xtiidxaman.

² Yan din gagbeedi chu reenin rniee xtiidx Dios: Laa reeman naj Bén rliladx guial Jesucrist bi't zi'c

bénguidxliuj. Bén rliadx ree zian yu' xSprijt Dios luxdoo reeman.

³ Per bén ad rliadx ree zian ad yu't xSprijtaman luxdoo reeman, laa reeman naj bén ralen Jesucrist. Ma biguejndi guial rayal gui't tijb bén su contr laaman. Abi' diizd yan ma za' sprijt guin guidxliuj, zeel zien ree bén ralen Jesucrist ma yu' loj guidxliuj guie.

⁴ Per lëjt xi'n ma najdi xi'n Dios, guiáad ree bén ralen Jesucrist ad zajct güün reeman lëjt gan, din mazri narooß guialrniabee ca' bén nabannë lëjt guial loj bén nabannë bén zinal ree nejz mal loj guidxliuj guie.

⁵ Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiáad ree bén ad rliadx ree zian rayagbee ree chu nabannë xSprijt Dios bén rulüü dunuj ree diidxli chutëenin nabannë sprijt ni rulüü ganax ni rusquiee.

⁶ Per dunuj ree ma nayajc ree xbejn Dios, abi' bén ma nünbee ree Dios rucaagdiajg reeman ni ranee ree, guiáad ree bén ad nünbeet Dios ni'quid rüjncwentt reeman ni ranee ree, zian rayagbee ree chu nabannë xSprijt Dios bén rulüü dunuj ree diidxli chutëenin nabannë sprijt ni rulüü ganax ni rusquiee.

Rën Dios dunuj ree

⁷ Rënan lëjt, rnin lojdi rayal yayën dulasa' ree, din guialrën lasa' zëed loj Dios. Gra bén rën lasa' naj xi'n Dios nünbee tëe reeman laaman.

⁸ Abi' bén ad rënt lasa' ad wayünbeetaman Dios, din guialrën lasa' zëed loj Dios.

⁹ Balüü Dios guial rënman dunuj ree, din majsij tijbzi xi'nman Jesucrist, guxhaalaman laaman

guidxliuj din yaya'p ree guialnaban delant loj Dios por laaman.

¹⁰ Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree.

¹¹ Rënan lëjt, zeel rnin lojdi, zi'c rën Dios dunuj ree, ziangajc rayal yayën dulasa' ree.

¹² Majsi achut waguiaa laaman, per bal rayën dulasa' ree, nabannë'qui ree Dios, abi' diidxli rayën reeman.

¹³ Dunuj ree rayagbee guial nabannë' reeman abi' laaman za' con dunuj ree, din ma banee xSprijtaman duloj ree.

¹⁴ Abi' dunuj gajcan baguiaa ragojn tëen guial guxhaal Xi'n Dios loj guidxliuj guie persi güjtaman por xtol gra ree bejn.

¹⁵ Chutëez rëb guial Jesucrist naj Xi'n Dios nabannëman Dios, abi' Dios nabannë laaman.

¹⁶ Dunuj ree rayagbee raliladx tëe ree guial rën Dios dunuj ree. Por laaman zëed guial rayën dulasa' ree. Abi' bën rën lasa' nabannëman Dios, guiáad Dios nabannë laaman.

¹⁷ Bal wali rayën ree Dios zi'c rënman, ad najtan ni yadxeb ree dxej güün xgualguxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannë' reeman loj guidxliuj guie.

¹⁸ Bën rën Dios, ad rdxebtaman, din bën rën laaman diidxli, ad rdxebtraman, per bën ad rënt laaman rdxebaman, din rüjnman xgab casti ni yayalaman, zeel bal chu rdxeb, ad walitaman rënman laaman.

¹⁹ Dunuj ree rayën Dios, din yaløj laaman guyën dunuj ree.

²⁰ Bal yu' bén rëb: “Rënan Dios”, abi' ralen lasa'man, rusquieeman. Din bal id rën lasa'man bén ruguiaaman, ¿xhienaag guiënman Dios bén ad waguiaataman?

²¹ Laagajcaman na: Bén rën Dios rayal guiën lasa'man.

5

Guial raliduladx ree Jesucrist zeel raguieen ree gan loj ni mal

¹ Gra ree bén rliladx guial Jesús naj bén guxhaal Dios, laa reeman naj xi'nman. Bal chu rën dux Dad ree Dios, në gra ree xi'nman rënman.

² Chi rayën ree Dios raguieen tää ree ni rniabeeman, dxel rayagbee ree guial rayën ree gra ree xi'nman.

³ Guial guiën bejn Dios naj guial güünman ni rniabeeman. Abi' ad nawëëgt naj guial güünman ni rniabeeman,

⁴ din gra bén naj xi'nman ma rüjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin.

⁵ Bén rliladx guial Jesús naj Xi'n Dios, tijbzi laaman zajc güün gan loj ree ni mal yu' loj guidxliuj.

Ni rulüü Dios dunuj ree xcwent Jesucrist

⁶ Jesucrist bi't loj guidxliuj, gurobnijsaman guxhie' tää xrejnman loj crüjz. Ad gurobnijstzaman, në guxhie' xrejnman. XSprijt Dios naj testiw, laaman rü diidxli xcwent ree nine.

⁷ Choon testiw yu' xanyabaa: xDadaman Dios, Jesucrist nē xSprijt Dios, guiyon reeman naj tǐjbzi Dios.

⁸ Yu' tēē choon testiw loj guidxliuj: XSprijt Dios, nē guial gurobnijs Jesucrist con ni guxhie' xrejnman loj crǔjz, guiyon reen rǔ diidx tǐjbzi.

⁹ Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan.

¹⁰ Bén rliladx Xi'n Dios, laaman rliladx ni rēb Dios xcwentaman. Per bén ad rliladxt laaman, rǔjnman Dios zi'c bén rusquiee, din ad rliladxtaman ni rēbaman xcwent Xi'nman.

¹¹ Abi' ni rēbaman naj guial ma baneeman guialnaban tiblyaaa duloj ree, guialnaban guin zēēd por xi'nman.

¹² Bén za'nē Xi'n Dios tǐjbzi, laaman naban tiblyaaa delant loj Dios, per bén ad za'nēt laaman tǐjbzi, laaman ad ca't guialnaban guin.

Ni bigra ca loj gui'ch guie

¹³ Cucan nine ree par lējt najdi bén rliladx Jesucrist Xi'n Dios din gagbeedi guial ma ca'di guialnaban tiblyaaa delant loj Dios.

¹⁴ Rayagbee ree zagdxe: chi yanaab ree xhienin lojman, rǔjncwentaman dunuj ree, bal yanaab ree zi'c rēnman.

¹⁵ Bal rayagbee ree rǔjncwentaman dunuj ree chi ranaab ree xhienin, ziangajc rayagbee ree zagdxe guial guneeman ni ranaab ree.

¹⁶ Bal chu dunuj ree rayagbee guial tǐjb dunuj ree cayguieen dol ni zajc gac perdon, rayal cwedxaman Dios por laaman zian gudēē Dios guialnaban tiblyaaa lojman, bal zajc gac dol guin

perdon. Yu' dol ni ad zajct gac perdon, abi' ad canitan guial cwedxidi Dios por bèn rüjn dol guin.

¹⁷ Graczi ni mal naj dol, per yu' dol ni zajc gac perdon.

¹⁸ Rayagbee ree guial bèn ma naj ree xi'n Dios ad rusnuutri rüjn reeman dol, din Jesucrist Xi'n Dios naj bèn rniaj laa reeman, abi' xindxab ad zajctri nabeex laa reeman.

¹⁹ Rayagbee ree guial nayajc ree xbejn Dios, per ree bénguidxliuj, bèn ad najt ree xbejn Dios, xindxab rniabee laa reeman.

²⁰ Rayagbee tée ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree bèn naj quijb Dios. Yan nadxu'në' reeman tijbzi por Xi'nman Jesucrist. Tijbzi laaman naj Dios, por laa téeëman yu' guialnaban tiblayaa.

²¹ Xi'n, gol gojp cudad chitëë chinalidi ni naladx ree bejn naj Dios.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

fb4ebcb8-e1f4-5bfc-b08c-f590e137d86d